



28. Aprili 2026

UPA2026/36

Uunga siunnersuut: Tusagassiorfinnut tapiissuteqartarneq pillugu Inatsisartut Inatsisaata allanngortinnissaa pillugu Inatsisartut Inatsisaat

(Ilinniartitaanermut, Kultureqarnermut Timersornermut Ilageeqarnermullu Naalakkersuisoq)

Siumup sinnerlugu Naalakkersuisut inatsisissatut siunnersuutaannut qujavugut, tassa Inatsisartut tusagassiorfinnut tapiissuteqartarneq pillugu inatsisaanik allannguinissamut siunnersuut.

Siumumi pingaartitarai nunatsinni tusagassiorfiit kiffaanngissuseqartut, tutsuiginartut, namminersortut tatiginartullu pigineqarnissaat. Tusagassiorfiit inuiaqatigiinni pingaaruteqarluinnartumik inissisimasuupput, innuttaasut paasissutissanik eqqortunik tuniorartussaamatikkitt, qaammarsaanermik, oqallinnernik pilersitsillutik kiisalu inuiaqatigiinni ammasuunermik qulakkeerinnillutik ingerlatsinissaat ilanngullugit.

Siumumiit nuannaarutigeqaarput siunnersuut Naalakkersuisut saqqummiummassuk. Tassami Siumumiit qinigaaffiup siuliai una pillugu nutarterinissaq kissaatigisimasarput, maannalu Naalakkersuisooqatigiinnermi isumaqatigiisummi ilaatinnissaanik piumasartisimasarput tunngavialugu maanna Inatsisartuni sammisussanngoratsigu.

Siumup ilisimaqqissaarpaa tusagassiorfiit silarsuaat maanna sukkasoorujussuarmik allanngoriartortoq. Ullumikkummi nutaarsiassanik ingerlatitseqqiineq annertunerusumik digitaliusumik aammalu kikkut tamarmik oqallittarfiatigut (socialmedia aqqutigalugu) annertoorujussuarmik ingerlanneqarpoq, taamaattumillu tusagassiorfinnut tapiissuteqartarneq nutarterneqarnissaa pisariaqalernikuuvoq aamma tamanna ujtarnikuugatsigu.

Siunnersuummi pitsaasutut isigaarput tusagassiorfinnut tapiissuteqartarnermi piumasaqaat ersarimmat, kalaallisut oqaatsigut atorlugit siammarterisunut taamaallaat atuutissamat, aammalu tusagassiorfiit naqitanik saqqummersitsisartunut tapiissutit allanngortinniarneqarnerat, taamaalilluni digitaliusumik nutaarsiassaqaartitsiviit aamma tapiiffiqarsinnaalernissaat pissalluni. Tamanna nutaaliornermut ikaarsaerneruvoq aammalu tusagassiorfinnut nutaamik aallartisaasunut, minnerunngitsumillu inuusuttunut digitaliusunik suliniuteqartunut periarfissiissalluni.

Taamatuttaaq Siumup pitsaasutut isigaa suli pitsaassuseq, tassa professionalismimi atorlugu kiisalu aqqissuisoqarfiup namminersornerata piumasaqaataanissaa. Nutaarsiassaqaartitsivinnimi aqqissuisoqarfimmi sulisut aalajangersimasumik amerlassuseqarnissaat qulakkeerneqassamat, taamaalilluni tapiissutit suliffeqarfinnut pitsaasumik suleriuseqartunut, tatiginartumik inuiaqatigiinnullu pingaarutilinnik nutaarsiassiorsinnaasunut atorneqassallutik.

Taamaakkaluortoq Siumumiit isumaqarpugut siunnersuummi mianerisassartai ataatsimiisitaliami sukumiisumik qulaagarneqartariaqartut.



Siullermik maluginiarparput piumasaqaat, tassa minnerpaamik sulisut pingasut (årsværk) aaqqissuisoqarfimmiittut, tusagassiorfinnut mikinernut nutaanullu digitaliusunut aporfissanngorsinnaammat. Siunertaq tassaappat nutaaliorneq assigiinngisitsinerlu siuarsarnissaat, taava eqqarsaatigilluartariaqarpoq pitsaassutsip ammasuunerullu akornanni oqimaaqatigiinneq eqqortuunersoq aammalu tusagassiorfiit angisuut aningaasatigullu inissisimalluartut kisiisa pillugit periarfissiinnginnissaq.

Aappaattut oqaatigissavarput digitaliusunut ammaaneq isumaqarsinnaavoq amerlanerusut tapiiffigineqarsinnaalissasut aningaasallu taakku atorlugit agguarneqartussat amerlissasut. Tamanna taamaangilaq. Tassami aningaasaliissutit annertusarneqanngippata, tamanna ullumikkut tusagassiorfiit pioreersut aningaasaqarnikkut ajornartorsioreersut nukillaarsarsinnaavaat.

Taakkua saniatigut Siumup pingaaruteqartutut isigaa oqallisigineqassasoq killilersuineq allattariarsornikkut tusagassiorfiit aammalu tusagassiorfiit nipilersornikkut assiliartalersukkulluunniit ingerlatitsiviit, soorlu podcastit, akornanni. Tusagassiorfiit atorneqarnerat allanngoriartortoq, taamaattumillu inatsisiliorneq aamma piffissamut naleqqussarneqartariaqarpoq.

Kiisalu Siumup erseqqissassavaa pingaaruteqartoq tapiissutit agguanneqarneranni ammasuunissaq, taamaalilluni tatiginnineq qulakkeerneqassammat aningaasat naapertuuttumik tunngavilersorluakkamillu agguanneqartut.

Siumut siunnersuummik suliaqarneq ingerlateqqillugu peqataassaaq pitsaasumik suleqataalluni. Kissaatigaarput tusagassiorfinnut tapiissuteqartarneq pillugu aaqqissuussineq nutaaliaasoq siunissamullu tulluarsagaasoq, pitsaassutsimik qaffassaasoq, nutaaliornermik aammalu nunatsinni tusagassiorfiit assigiinngisitaartumik ineriartornissaannik tapersersuisoq.

Taamatut oqaaseqarluta Siumup siunnersuut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliamut ingerlateqqinneqassasoq.

Erik Jensen, Siumut